

Oratio funebris
D E
ILLVSTRISSIMO
PRINCIPE AC DOMINO,
DN. AVGVSTO, DVCE
ac Electore Saxonix, &c.



HABITA IN EXAMINE
ALVMNORVM LVDI PROVINCIALIS
ad Muldam, XIII. Martij,

A

Iacobo Furmano R.

ANNO M. D. LXXXVI.


Original

1742

1742

1742

1742



1742

1742

ILLVSTRISSIMO, POTENTISSIMOQVE PRINCIPI

AC DOMINO, DOMINO CHRISTIANO,
Electori Saxonie, &c. Domino suo
clementissimo.

DVX AVGVSTIADE, patria spes altera terra,
Inclita Saxonica fama decusq; domus:
Aggredere o felix nunc Electoris honores,
Et cape, qua summus regna dat ipse DEVS.
Te patris AVGVSTI celebris super aethera virtus
Excitet, & proauum nomina magna ducum.
Sit tibi pax cura, fuge bella, fuge horrida bella,
Qua damnum terris exitiumq; ferunt.
Inprimis sed ama CHRISTVM, de nomine cuius
Nomen habes, Princeps o generose, tuum.
Et quando vacat, hunc inter molimina rerum,
Que te magna tenent, respice queso gregem.
Et tuam scholam, qua te iam pendet ab vno,
Auxiliumq; tuum supplice voce rogat.
Tu sis presidium docta & tutela Minerua:
Ne nos desertos ne tua dextra sinat.
Sic te Christus amet, proq; hoc te munere summa,
Dux AVGVSTIADE, prosperitate bect.

Illustriss. Celsitudinis
Tuae subiectiss.

Jacobus Furmanus

R

ORATIO.



CONSTITVTVM EST de scholæ huius consuetudine, vt statis anni temporibus examina duo instituantur, in quibus discipulorum in literis profectus perspiciantur, & qui sese diligentia probent, ad ordines superiores traducantur. Quæ quidem exercitatio quantum commodi discen- tibus afferat, præsentis quidem instituti non est, vt à me multis comemoretur. Quare volens narratione ista supersedeo. Hoc quidem omnino constat, vt totius rei summam paucissimis cõprehendam, ad discipulos redire emolumentum, ad præceptores verò molestias, quas ipsis gignit non paucorum, leuiter studia attingentium, foecordia atq; desidia: quæ deuorandæ tamen nobis sunt, modò vestris studijs consulatur. Antè verò, quàm ad probationem ipsam & censuram accedamus, visum nobis fuit ab oratione, breui illa quidem & tenui, sed huic tamen & tempori & loco, vt opinor, conueniente, initium facere. Dicendi enim materiem suppeditare nobis videtur hodiernus dies, quo Illustriss. Princeps ac Dominus, Dn. AVGVSTVS, Dux Saxoniae, & CR. Imper. Septemuir, Fribergam ad sepulturam deportatur. Cuius morte cum nemo bonus non afficiatur, & in luctu iaceat, nos quoque decet alumnos ipsius, vt & ipsi, doloris indicium edendo, moerorem nostrum declaremus, & sanctis manibus, si non pro dignitate, at pro parte nostra tenui, & in-

& ingenij mediocritatē, iusta faciamus. Postulant enim hoc quaecumq; officium nostrum defuncti Principis erga nos merita, vt grata recordatione memoriam illius prosequamur. Offeruntur autem hīc multa sanē, quæ & de antiquissima Saxonix ducum origine, & de ingenij corporisq; eximijs dotibus, & de virtutibus Electoris nostri excellentissimis non incommodē recenseri fortassē possent. Verū, cū latissimē ea pateant, & intelligentiam meam tantarum rerum explicatio superet, eloquentiamq; non vulgarem requirat, hæc relinquo. Talis enim ac tantus Princeps extitit A V G V S T V S, vt orationis meæ paupertate ne minimam quidem partem laudum ipsius consequi possim. Quare omīssis illis difficilioribus, captumq; meum excedentibus, summa sequar fastigia rerum, & dicam tantū de beneficijs, & meritis quibusdam præcipuis, quibus patriam, Ecclesiam, scholasq;, & inprimis hanc prouincialem Grimmensem cumulauit, & suam erga omnes subditos charitatem probauit. Neq; hīc tamen exquisitē omnia persequar, sed ea tantū exponam, quæ ante oculos sunt, & scire vniuersos decet: idq; eo faciam, vt nostram, quemadmodum modò dictum est, erga optimum Principem pietatem ostendamus, & ad communem luctū, nec non preces nosmet ipsi excitemus. Qua de re breuiter pronunciantem vt benignē me audiat, à vobis, Collegæ obseruandi, officiosē peto: spero item, discipulos aures mihi beneuolas, & attentas præbituros esse.

Ex hac vita mortali Calendis Octobribus anni superioris decessit inclyta heroina A N N A, regia stirpe nata, Illustris. Electoris coniunx, cuius exequiæ

hoc quidem in oppido, vt noſtis, celebrata ſunt die,
poſtquam defuncta eſt, octauo. Eius ex morte quan-
tum doloris luctusque ceperint hæ regiones, in re-
centi adhuc habemus memoria. Verum nulla cala-
mitas ſola, habet tritum ſermone prouerbiũ. Nam
licet vulnus illud aliqua ex parte coaluiſſe videretur,
collocata in matrimonium Electori viduo mœſtiſſi-
mo inclyta Principe Agnete Heduuige, Ioachimi Er-
neſti, generoſiſſimi Principis, Ducis Anhaltini filia:
tamen nunc recrudescit, propter ipſius Septemviri
ex hac vita exitum. Itaque dolores refricantur, &
ſollicitudines duplicantur, & ad maiorem mœſticiam
ſubditi reuocantur. Et certè quidem ſi vllum vnquam
tempus miſerum & calamitoſum incidit, hoc iam ma-
ximè luctuoſum, ſummeque miſerandum eſt. Nam
eiusmodi bonum amiſſum eſt, quod nulla vnquam
ætas reſtituet. Quis non doleat, quis non toto pe-
ctore conſternetur; quis ſibi à lacrymis temperet?
Quod ſi quis hoc caſu non tangatur, in vtramq; aurem
ocioſè dormiens, & non magis moueatur, quàm ſi du-
ra filex, aut ſtet Marpeſia cautes: is omnis humanita-
tis expers eſſe, & naturam ferinam maximè attingere
videtur. Orbati ſumus, proh dolor, Principe opti-
mo, patre patriæ, ſcholarum, & Eccleſiarum nutri-
tore. O rerum humanarum fragilitatem, fortunæq;
varietatem, ô mortis ſæuiciam & importunitatem,
quæ nulli hominum parcit, & æquo pulſat pede pau-
perum tabernas, regumq; turres, vt canit Horatius:
atq; adeo optima quæq; rapit, deteriora verò relin-
quit. Atque vt planum & perſpicuum nobis fiat, qua-
lem Principem amiſerimus, agite paulò altius amo-
rem & beneficia illius erga patriam collata conſide-
remus.

remus. Reliquit HENRICVS Alberti F. Princeps
Saxoniae laudatissimus duos praestantissimos filios,
MAVRICIVM & AVGVSTVM, alterum belli-
ca laude, alterum toga clarissimum. Posteaquam ve-
rò Mauricius heros fortissimus, pro aris, vt dicitur,
focisq; fortiter dimicans, & à patria manifestam vim
propulsans, suam in terris vitam clausit, & in beato-
rum consortiũ receptus est: AVGVSTO fratri har-
um regionum gubernationem, & Septemviralem
sacri Imperij Rom. dignitatem reliquit, Quam qui-
dem honoris possessionem tum virtute sua tueri, tum
ornare etiam, & augere pro virili AVGVSTVS
studuit, in eamque cogitationem ac curam totus in-
cubuit, vt Reipub. status labefactatus & conuulsus
sanaretur. Ac licet in initio turbulenta ei multa ob-
ijcerentur, quæ bellum minitabantur, sanguinemque
spirabant, tamen autoritate sua, qua valuit plurimũ,
eò rem deduxit, vt omnes seditiones, & discordiæ
celeriter comprimerentur, & de manibus hostium ar-
ma delapsa caderent, omniumque tumultuum reli-
quiæ spontè extinguerentur. Itaque cuncta ab eo ita
composita fuere, vt perpetua in pace deinceps viue-
ret, & sua pacatè possideret, nulla hostiũ incurssi-
one vexatus. Quòd certè in summa felicitate ponen-
dum est. Quid enim in hac vita iucundius, quid opta-
tius, quid generi humano salutaris accidere potest,
quàm pax, quàm concordia, quàm ocium? Pax
optima rerum, quas homini nouisse datum est, ca-
nit poëta. Pax cum geritur, salua sunt, & bene sese
habent omnia. Nam & pietas colitur, & iusticia ex-
ercetur, & publicæ res florent, & domesticæ crescunt.
At verò inter arma leges silent, res & publicæ & pri-
uatæ

natae affliguntur, regiones vastantur, populi cæduntur, vrbes in seruitutem mittuntur, ciues trucidantur, & quasi flammis vruntur & consumuntur omnia. Quamobrem M. Cicero iniquissimam etiam pacem rectè antefert iustissimo bello, quod nunquam; nisi maxima cum aliorum clade, suscipitur. Quanquam autem Princeps noster singulari animi magnitudine ac robore excelleret, ita vt nullis minis moueretur, & ad quosuis labores suscipiendos, periculaque adeunda paratus esset, atque adeò vitam suam saluti communi postponeret: tamen pro ea, qua præditus fuit, moderatione ac prudentia, pacis autor semper extitit, & omnia prius, quàm armis, experiri maluit, & non nisi coactus ad bellum profectus est. Nec verò minus clarus & fortis extitit, ac si perpetuò in armis vixisset. Neque enim in bellis modò, sed etiam in Repub. administranda animi excelsi præstantia cernitur. Quapropter libro de officijs primo Cicero domesticas fortitudines, siue res vrbanas militaribus ac bellicis pares esse, adeoque maiores interdum clarioresque fuisse ostendit, quod quidem non tantùm subiectis rationibus & argumentis, verùm etiam appositione exemplorum tum Græcorum, tum Romanorum illustrat & confirmat. Quæ doctrina cum non ita pridem, vt meministis, à nobis explicata sit, non est necesse, vt plura huc accersantur. Vestrum erit, discipuli qui estis, vt ipsi ad Ciceronem recurratis, & quæ ab eò copiosè, & luculenter eo in loco differuntur repetatis, & in memoriam reuocetis. Quod verò ille de sui seculi præstantissimis viris gloriatur, id de nostro quoque Principe clarissimo rectè prædicari potest, non minorem vtilitatem Reipub-

Reipublicæ togatum eum attulisse, quàm alium quem-
uis, qui bella gessit. Quis gubernationem illius om-
nibus triumphis anteferri posse non videt? ô paci-
ficum, felicemque Principem: ô fortunatos subditos.
Talia olim secula fuerant, regnante Octauio Augusto
II. Romanorum Imperatore, cuius cum administra-
tione nostri septemviri gubernatio magnam similitu-
dinem habere videtur, propter prosperam rerum om-
nium successum ac felicitatem, otijq; diuturni tran-
quillitatem. Vt enim ille pacem terris restituit, cum
antea non solùm externis, sed etiam ciuilibus bellis,
ac dissensionibus intestinis orbis terrarum arderet:
ita noster AVGVSTVS gratiam his regionibus quie-
tem peperit. Verùm Imperatore tamen illo longè
felicior fuit, propter Christi cognitionem, qua ille
caruit. Nam licet omnium maximum in terris mira-
culum, Octauio Imperante, acciderit, cum nimirum
Filius Dei carne nostra indutus, ex virgine nascere-
tur, & quidem, vt de æterni Dei voluntate, & Pro-
phetarum vaticinatione, nullibi nisi Bethlehemæ nas-
ceretur, in causa fuerit tributi iniqua exactio & so-
lurio: tamen inscius ille tutum cœli terræque regi
domicilium præstitit, & creatorem ac Dominum
suum non agnouit. Sed quoniam, vt diximus, pa-
cis studiosissimus fuit AVGVSTVS Princeps, libet
subijcere Adami Siberi Epigramma, quo pacis amo-
rem & studium in eo maximè celebrat. Quod quia
Iohanni Stigelio, viro & Poëtæ optimo adeo pla-
cuisset accepimus, vt honorificam illius mentionem
crebrò fecerit, ea in spe sumus, fore, vti, cum Si-
beri nomen meritò nobis omnibus gratissimum adeo-
que sanctissimum esse debeat, carmen illud quoque

non ingrattum sit futurum. Id autem ita sese habet :
*Pacis amans Deus est , pacis veneremur amantem ,
Vt nostros leta pace serenet agros .
Bella diu viguere nimis : nunc impia duri
Inquinet annosus militis arma situs .
Tu quoq; Dux imitare tuos AVGVSTE parentes ,
Quos lenat atherco candida fama polo :
Flebile Martis opus , crudeliaq; arma perosus ,
Quod facis , angusta sit tibi pacis amor .
Astyagis cadit ense nepos : vastator Olynthi
Ipse domus in se concitat arma sua :
Augusto Aemathius iuuenis , qui limite mundi
Aestuat , insidijs terra venena bibit .
Pax quibus est cordi , placide moriuntur : at arma*

Quos violenta iuvant , mors violenta rapit .
Neq; verò tantum Elector in eo laboravit , vt inter
homines iusticiæ locus esset , & in pace vitam agerent
subditi , & quàm maximè ciuitates florerent : Sed ma-
xima ei , & quidem potissima cura fuit , vt æternæ a-
nimarum salutis ratio haberetur . Quanta hic sese
ostenderit nobis Dei præpotentis erga nos clemen-
tia , & charitas , nulla orationis copia exponi potest ,
qui vltimis temporibus Germaniam quoq; , & inprimis
has terras , Euangelij face accensa , è tenebris
pontificijs in lucem vocauit , & corda Principum Spi-
ritus sui gratia collustrauit , vt veritatem cœlestem
agnoscerent . In quorum numero præcipui fuerunt
Saxonix Duces , omni laude dignissimi , Electoris no-
stri maiores , qui , patefacta pontificum Romanorum
fraude , ex cæteris ducibus primi incorruptam Euan-
gelij doctrinam amplexi & tutati sunt . Quis animi
ipsorum altitudinem , & constantiam non admiretur ,
cum,

cum infaniente diabolò , mundo ira exandefcente,
pontificia cohorte terram cœlo mifcere conante, &
omnibus deniq; hoftibus tumultuantibus , fortiter in
vera doct̃inæ facræ fententia perfeuerarent, & quam
de veritate cœlefti defleſcerent, vitam pro ea poti-
us profundere non dubitarent. Quis incitatum ho-
ftium potentiffimorum furorem , & rabiem diuinitus
fractam & ſedatam neget ? quis Principes à Deò ipſo
defenſos, ac ſeruatos eſſe non videt ? Nam abſq; eius
protectione ſi fuiſſet, non aliter, atq; oues à lupis fa-
melicis, conſumti fuiſſent: Excitauit autem ſimul De-
vs ad hoc opus viros pietate doct̃inaq; præſtantes,
in quibus antefignanus quaſi & dux fuit Martinus
Lutherus, qui ſpiritu Dei ductus, intrepide ſuam con-
feſſionem edidit, & primus obſtitit furori pontifi-
cum, & qua merſi antea eramus, caliginem detexit,
condonationemq; peccatorum, & vitam ſempiter-
nam adipiſci nos docuit, non noſtris meritis, non
pecunia comparatis diplomatis, quas vulgò indul-
gentias vocantur, aut alijs eiufdem generis ineptijs,
ſed ſolius Filij Dei obedientia & merito, cuius vnus
ſanguis in ara crucis pro nobis effuſus, ab omnibus
nos peccatis emundat, vt loquitur Apoſtolus. Hæc
doct̃ina ſacrarum literarum teſtimonijs innixa, con-
ſolationem leuationemq; affert mentibus, animi an-
gore, & cruciatu conſiſtantibus. Hæc Lutheri mini-
ſterio nobis reſtituta, ingratif & inuitis omnibus ad-
uerſarijs, longe lateq; propagata eſt, & ad verum
Dei cultum multas nationes ac populos conuertit.
Eadem hac doct̃ina, & religione per manus quaſi
ab HENRICO patre, & fratre MAVRICIO PRÆ-
CL^l tradita & accepta AVGVSTVS imbutus, nihil

prius, nec antiquius habuit. Quantopere enim pro
ea sollicitus fuerit quantasq; curas gesserit, in propa-
tulo est. Nam non solum toto pectore eam amplexus
est ipse, & morum sanctitate expressit, sed in ditio-
ne etiam sua sincerè ipsam doceri, & Ecclesijs ido-
neos doctores præfici voluit, qui rerum diuinarum
cognitione instructi, verbum DEI sacrosanctum, sine
fallitatis admixtione, populo proponerent, & æter-
næ salutis autorem solum IESVM CHRISTVM
monstrarent. Atque, vt omnia ordine, ac decenter
in Christianorum societate de doctrina Apostoli per-
agerentur, tribus in oppidis senatum Ecclesiasticum
constituit, in quem Theologi pariter ac Politici, pie-
tate sapientiæque viri celebres leguntur. His omni-
um Ecclesiarum inspectio, de doctrina & ceremonijs
diuinis iudicium, Pastorum electio & confirmatio,
in vitam ac mores ipsorum inquisitio, cognitio de
dogmatibus ac hæresibus, Ecclesiasticarum contro-
uersiarum explicatio, & causarum ad matrimonium
pertinentium compositio commissa, ac credita est.
Constitutum porro est, vt Ecclesiarum antistites in
oppidis, quos vulgò Superintendentes nominant, in
sua quisque diocesi, respectum haberent ad eos, qui
in vicinis pagis atque oppidulis docent, &, si quid
ab his decidi non posset, ad Ephoros perferretur,
qui in Consistorio causas disceptationesque excuti-
unt, & explicant. Constitutum denique est, vt cer-
to anni tempore Synodus in vrbe Dresda, semel qui-
dem vere, & iterum autumnio congregaretur, in qua
omnia ea, quæ vel in scholis, vel in Ecclesijs contro-
uersa sunt, examinarentur. Quod si prauorum dog-
matum autores, ouile IESV CHRISTI infestan-
tes, exo-

res, exoriri animaduertit, tūc verò nullis sumtibus
pepercit, nihilque intermisit eorum, quæ ad Ecclesiæ
commoda spectare visa sunt. Nec quicquid ante, quàm
ut, conuocatis sacrarum literarum interpretibus ac
consultis, de negotio religionis sermones confer-
rentur, dogmatum obscuriorum nebulæ luce verita-
tis coelestis discuterentur, lites scripturæ autoritate
dirimerentur, obtrectatorum conatibus obuiam ire-
tur, errores turbulenti ex norma verbi diuini dijudi-
carentur, cognitiq̃ reijcerentur, inq̃ opinionum
varietate verum inuestigaretur, & constituta concor-
dia sine contentionibus viueretur. Itaque principijs
obstans, ne corruptelæ latius serperent, & dissemi-
narentur, animosq̃ simplicium occuparent, omni
ratione prohibuit. Libet hîc commemorare, quæ
x i. Cal. Iunias anni septuagesimi secundi ad Sibe-
rum nostrum, & cæteros præceptores perscripta sunt.
Ea tempestate doctrinæ quasi mutatio quædam fieri,
& Dipnosophistæ pestiferum suum virus primum
spargere, & in animos auditorum insinuare cœpe-
runt. Et edita tum sunt noua doctrinæ Christianæ
elementa, & alia etiam nonnulla scripta cum Augu-
stana Confessione quibusdam in capitibus pugnan-
tia. At cū Sapientissimus Princeps monstrum aliquid
eiusmodi librorum editione ali' intelligeret, & me-
tueret, ne temporis progressu doctrina in Augustana
Confessione comprehensâ, è scholis & templis elimi-
naretur, & exularet: præceptores huius scholæ illu-
stris per literas cohortatus est, ut sibi ab eiusmodi
scriptis cauere, in quibus perniciosus error de cœ-
na Domini occultatus delitesceret, & ut non modò
Philippi Melanthonis, sed etiam sanctissimi viri Mar-
tini Lu-

mini Lutheri lucubrationes diligenter legēdo euoluerent, puericiæque inculcarent, & imprimis, ne quem alium quàm Lutheri Catechismum vnà cum Philippi Examine discipulis ad ediscendum proponerent, nec vllō modo nouos libros de religione suspectos obtrudi sibi paterentur. Quæ paterna Illustrissimi Principis admonitio sæpè nobis repetenda, diligenter custodienda, & pectoribus nostris planè insigenda est. Quid verò dicam de nupera illa beneficentia, qua clementissimè prospexit, vt, si qui vel propter doctrinæ cœlestis confessionem exterminati, & in exilium eiekti essent, vel ætatis ingrauescentis vicio, valetudinisue, quæ senectutem comitatur, imbecillitate impediti, officij sui muneri præesse amplius non possent, victus illis ad vitam suppeteret? Neque hoc tantum, sed decreuit etiam, vt cum ij, qui docendo alijs inseruiunt, res interim suas plerunq; negligant, & tenuioris afflictiorisque sint fortunæ (nec enim decet, vt ex doctrinæ tractatione quisquam suum commodum quærat, & turpi lucro inhiet) post mortem ipsorum viduis, ac orphanis eleemosyna liberalis ad sustentationem distribueretur. Atque in talium indigentium vsum quotannis quinque millia aureorum consecrata diuiduntur. O factum, omnium seculorum & gentium memoria dignissimum, quod vel solum immortalem nominis gloriam, & laudem sempiternam Principi comparare posset. O liberalissimum Ducem, qui verissimè ex eorum numero est, quos miseræ & afflictæ Ecclesiæ nutricios futuros esse per Prophetam Deus promisit. Et certè quidem si facta ipsius animis nostris contemplamur, vt in Reipub. administratione rectè cum Augusto

gusto. Cæsare, quemadmodum paulò ante ostensum est, comparatur: ita in rerum diuinarum procuratione non indignè cum optimis quibusque Israëlitarum ducibus, ac regibus Christianis conferri posse videtur. Atque, ut ex omnibus exemplis, quorum sacrae literæ meminerunt, vnum solummodò proferam, an non in plurimis rebus I O S I A M, gentis Iudaicæ regem, imitatus est, quo post Dauidem provincia illa nec meliorem, nec sanctiorem gubernatorem habuit. Is enim, quòd diuini numinis obseruans, & idololatricæ, superstitionisque hostis esset acerrimus, sacra peregrina abrogauit, templum ab antecessoribus regibus contaminatum purgauit, aras commentitij numinibus consecratas euertit, pentateuchon ab Helcia summo sacerdote inter parietinas templi reperi- tum publicauit, in lege diuina rectè erudiri populum curauit, ad templi ædificationem necessaria copiosè suppeditauit, & neque ad dextram, nec ad sinistram flectendo, Dauidem generis sui Principem æmulatus est. Has virtutes si animo & cogitatione complectemur, in nostro quoque heroe sanctissimo fuisse reperiemus. Quid enim, an non is quoque religionis Christianæ propugnator, ac veritatis cœlestis assertor, & gloriæ ac maiestatis I E S U C H R I S T I vindex fuit iustissimus? Sed longiore oratione non utar, in commendando optimi Principis studio, quod præstitit maximum maximeque salutare, in tuenda, conseruandaque doctrinæ cœlestis puritate. Quid enim verbis opus est, vbi res loquitur ipsa? Quod verò de cura illius erga Ecclesiam dictum est, idem de scholis intelligendum est, quæ ab Ecclesia seiungi nec possunt, nec debent. Atque ut silentio
iam

iam prætereamus, quibus beneficijs scholas omnes,
& imprimis Academias ornauerit atque auxerit, agi-
te oculos & mentem in hunc modò ludum prouin-
cialem conuertamus, & diligenter cum animis no-
stris liberalitatis illustrissimæ beneficia perpendamus.
Vsa est hæc schola præ cæteris duabus illustribus, quæ
plerunque meliore conditione fuerunt, quam qui-
dem felicitatem nequaquam tamen ipsis inuideo, sed
gratulor potius, & ex animo precor, vt perpetuò flo-
reant, nec vnquam eandem fortunæ aduersitatem
experiantur: vsa est, inquam, singulari fato, & præ-
cipua quadam fortuna, eoque miseriarum superiori-
bus annis redacta erat, vt earum rerum premeretur
inopia, sine quibus ægrè, vel nullo potius modo
viuitur. In agris erat vastitas, in granarijs solitudo,
in cella penaria penuria, & quocunque aspiceres,
inanitas erat, eoque loco res omnes positæ erant, vt
de nobis actum esse arbitraremur. Sed nec dum ca-
lamitatum omnium finis erat. Accessit illud quoque
malum, vt, rebus in discrimen ita adductis, Adamus
Siberus, Rector huius ludi incomparabilis, præce-
ptor, & socer meus perpetuò colendus, cuius ver-
sus supra recitauimus, cum scholæ vicem ita doleret,
miseriasque eius deploraret, paulò post ipse nobis
eriperetur, eo quidem tempore, quo operam illius,
& consilium hæc schola maximè desiderabat. Sed
quorsum spectat isthæc narratio & querela? Eò scili-
cet, vt amplior illustriorque reddatur benignissimi
erga nos Electoris munificentia. Is enim, cognita no-
stra indigentia, beneficentiam suam in nos minimè
clausit, sed laborantes & labantes res subleuauit, &
ad rei domesticæ instaurationem mille & quingen-
tos au-

tos aureos largitus est. Hoc beneficium cum tantum
 sit, vt verbis celebrari satis non possit, grata saltem
 mente agnoscamus, nec vnquam ex animo nostro elabi
 bi patiamur, & ne munifica illa liberalitas denuò pe
 reat, (nescio enim quid scholæ adhuc metuum) omni
 bus precibus à Deo cõtendamus. In eo enim omnes
 neruos contendit Satanas, capitali odio à Deo con
 ditore, & hominibus Dei metuentibus dissidens, a
 deoq; obnixè manibus pedibusq; facit omnia, vt
 scholæ dissipentur, lacerentur, euertantur, vastentur
 & spolientur. Quare suos per administratos & vicarios
 calumnijs, conuitijsq; eas deformat, & omnibus ini
 urijs afficit. Sed nunc, proh dolor, tam liberalis
 Princeps, & patronus summus diem suum obijt, cuius
 corpus hodierno die Dresda elatum Fribergam
 ducitur, vt ibi in patrium monumentum condatur.
 O triste spectaculum. Quæ verò orationis copia
 dolorem istum charare potest? Ad eius exequias
 cohonestandas conuenerunt multi Germaniæ Prin
 cipes & Comites, vna cum Illustrissimo Principe Chri
 stiano AVOVS R. F. funeri operam dantes: quos se
 quuntur Optimates, & flos nobilitatis, qui omnes
 tam nobile membrum, ab imperio Romano auulsum,
 acerbissimè dolent. Sed nec procures tantum veste
 lugubri conspiciuntur, & in moerore sunt, sed etiam
 omnes omnium ordinum homines in luctu & squalore
 iacent, & non tam Principem, quàm patrem pa
 triæ mortuum lamentantur, non ipsius quidem, sed
 nostra causa, qui superstites sumus. Nam ad Electo
 rem quod attinet, pro certo habemus, ex omnibus
 eum miserijs, grauissimisq; vitæ laboribus liberatum
 esse, animamq; ipsius corporis vinculis solutam, in

beatissimam vitam commigrasse, ociòq; iam frui iucundissimo, & gloriosam expectare resurrectionem, qua iterum corpori copulata, ad vitam immortalem, eamq; bonis, ac gaudijs omnibus circumfluentem, reuocetur. Nec si optio ei detur, rediturnum eum ad nos esse, etiamsi totius mundi administratio committatur. Et quis enim in hanc miseram, & ærumnarum, incommodorumq; plenissimam vitam reuertatur, in concilio cœlestium collocatus, bonisq; infinitis cumulatus? Quare nihil illi mali contigit, nobis accidit, & absq; dubio, quæ Deus auerſat, impendent pericula. Cum enim e medio tolluntur præstantes heroës, plerunq; magnarum calamitatum acerbitas imminet: id quod tùm alijs multis, tùm ipsius loſiæ regis, cuius paulò antè meminimus, exemplo planum fieri, & demonstrari potest, cuius obitum quæ mala secuta sint, regum Israëlitarum ac Iudæorum docet historia. Et quidem iam diu iustissimam Dei iram commeriti sumus, propter verbi diuini, quod in fastidio iam ubiq; est, contemtionem, & propter vitæ nostræ impietatem. Quotus enim quisq; sanus est, qui voci cœlesti obtemperet, & beneficia Dei celebret? Videmus certè vulgò fieri, vt in omnibus sceleribus pleriq; volutati, in diem viuant, noctes diesq; helluationibus studeant, luxuriâ diffuant, nomen Dei cum vanitate vsurpent, diris atq; exactionibus sese, & alios deuoteant, opes alienas sistant, fraudent, decipiant: & quis omnia corruptissimi huius temporis vicia enumerare potest? Ex his verò malis quid tandem futurum sit, ratiocinando colligi fortasse potest. Videntur certè extrema quæque nos manere. Vt autem ex malis, est poenis imminentiſ

nentibus elabamur, nostrum est, ut à prauitate vitæ
ad studium pietatis conuersi, naturæ nostræ vicio-
sitate agnoscamus, & delicta detestemur, vitam mo-
resq; corrigamus, pacem Deo irato ex manibus qua-
si extorqueamus, suppliciterque rogemus, ut, Filij
sui Seruatoris nostri vnici ergò, nostri miseretur,
transgressiones, ac peccata nobis condonet, suamq;
gratiam largiatur, quò in sanctitate vitæ deinceps
ambulemus. Nam si vnquam precibus opus fuit,
iam certè maximè orare debemus. Habet enim Ec-
clesia hostes plurimos, qui Illustrissimi septemviri
morte non modò non afficiuntur, sed sine dubitatio-
ne lætantur, & certam sibi victoriam ac triumphum,
eo iam sublato, de nobis promittunt, quorum calli-
da consilia, machinationes, insidias, technasq; in
nostram perniciem compositas, mutari, eludi, con-
fringi, & confundi, à Deo vnico in rebus aduersis
auxiliatore petamus. Et cernimus quidem his ipsis
in ærumnis, quibus iam accipimur, Dei optimi bo-
nitatem, qui A V G V S T O largitus est filium C H R I -
S T I A N V M, maturum imperio, consilioq; promptum,
& tractandæ Reip. gnarum ac scientem, qui ab hinc
quàdriennio in matrimonium duxit inclitam Princi-
pem Sophiam, illustrissimi Principis Iohannis Ge-
orgij, Electoris ac Marchionis Brandenburgensis fili-
am, ex qua duos filios Christianum Augustum, &
Iohannem Georgium, & vnā filiam suscepit, de qui-
bus superstites filios generosissimos, ~~quos liberos~~
Deus prò clementissima sua voluntate quàm diutis-
simè saluos, & incolumes conseruet. De eo verò
Christiano Principe optima quæq; sibi hæ regiones
pollicentur. Nam & à natura bene informatus, & ita

in prima ætate institutus est, vt omnia summa ab eo expectari debeant. Quid? quod iam diu patrijs vestigijs ingressus, suam in negotiorum difficiliorum explicatione dexteritatem, atq; ingenij acumen probauit. Huic Christiano Electoris dignitatem patria gratulatur: hunc subditi Dominum agnoscunt, & libentissimi animis sese imperio illius subiiciunt: huic salutem incolumitatemq; suam pijs precibus Ecclesia & scholæ commendant: huic noster etiam cœtus sese in clientelam dicat. Quare in ipsa etiam doloris acerbitate adhuc habemus, quod gaudeamus, intuentes generosissimum Principem CHRISTIANVM, regni successorem, & paternæ virtutis ac gloriæ hæredem, factorumq; illius imitorem: ex cuius vita tantum solatii capimus, quantum ex obitu patris allatum nobis doloris est. Hac consolatione reficiamur ac recreemur, æternamq; simul de mortui Principis Augusti, præclarissime de his terris meriti, memoriam conseruemus, & veteres Germanos imitemur, qui, vt Cornelius Tacitus in libello de ipsorum moribus scribit, lamenta & lacrymas citò, dolorem ac tristitiam tardè ponunt. Erminis lugere honestum est, viris meminisse. Hortor verò vos, Discipuli, vt, quorum ea est facultas, in Principis clementissimi nutricij nostri obitum, versus aliquot grati animi memorix ergò conficiatis, quod officij antea mortuæ illustrissimæ Heroïnæ D. Annæ, coniugi ipsius nonnulli vestrum præstitistis. Nos inter occupationes, pro re nata, epitaphium conscripsimus, quod recitabimus.

MEMORIAE ILLVSTRISSIMI

PRINCIPIS AVGVSTI, DVCIS SAXO-
niae, & CR. Imp. VII viri, PP.


Avgustus iacet hic, oculus Germanidos ora,
Gloria septem inter famag, summa viros.
Teutona quem raptum deplorat funere tellus,
Et patria luget Misniae orba patrem.
Flet pietas, mareq, fides, & veste nigella
Principis ad tumultum pax sedet alma sui.
Occidit heu Princeps sanctissimus: ô mala fata,
Qua tantum nobis eripuerunt ducem.

Sed hic finis nostræ orationis esto.

TE VERO SEMPITERNE DEVS, PATER
Domini ac Seruatoris nostri Iesu Christi toto pe-
ctore precamur, ne offensus peccatis nostris, pro eo
ac meriti sumus, nobiscum agas, sed in iustissima ira
tua interminatæ clementiæ memor sis. Conserua no-
bis verbum tuum, & mysteria sacrosancta, & à cor-
ruptelis nos custodi. Inprimis Spiritu tuo sancto cor,
& mentem Illustrissimi Principis Christiani, Electoris
noui, rege & governa, vt ea ante omnia spectet, quæ
ad nominis tui sanctissimi gloriam, & Reip. Christia-
næ incrementum, & vtilitatem faciant. Da pacem
terris, vt quietam, & tranquillam sub eo vitam aga-
mus, cum omni pietate, & gravitate. Bella verò,
tumultus, seditiones, & alia, quæ impendent, in-
commoda benignè auerte, & consilia eorum, qui ar-
mis delectantur, impedi. Sed & scholam hanc pro-
vincialem clementer respice, benedic laboribus no-
stris, & fac, vt omnes actiones nostræ tibi seruiant,

& ita sese quisque in delegato sibi officio gerat , ut
inculpatus reperiatur , & fidem, ac bonam conscien-
tiam ad Deum retineat : & tandem , exacto huius vi-
tæ curriculo , ab beatissimam regni tui lucem creden-
tes transfer , idque facias per & propter Filium tuum
IESVM CHRISTVM , Dominum & Redemptorem
nostrum vnicum, cui tecum, & cum Spiritu San-
cto laus sit , maiestas ac gloria in omnem
seculorum perennitatem,
AMEN.

D I X I.



L I P S I A E,
IMPRIMEBAT IOHANNES
S T E I N M A N .

Anno M. D. LXXXVI.